

Aatsitassanik tuniniaaneq aamma avammut annissuineq pillugit Namminersorlutik Oqartussat nalunaarutaat

Aatsitassat pillugit ingerlatallu tamatumunnga pingaarutillit pillugit inatsisartut inatsisaat nr. 7, 7. december 2009-imeersumi (aatsitassanut ikummatissanullu inatsit), Inatsisartut inatsisaanni nr. 26, 18. december 2012-imeersumi, Inatsisartut inatsisaanni nr. 6, 8. juni 2014-imeersumi, Inatsisartut inatsisaanni nr. 16, 3. juni 2015-imeersumi aamma Inatsisartut inatsisaanni nr. 34, 28. november 2016-imeersumi allangortinneqartumi § 31, imm. 1, § 45, imm. 5, § 45 c, imm. 3 aamma 4, § 45 d, § 96, imm. 3 aamma 4 aamma § 97 naapertorlugit aalajangersarneqarput:

Kapitali 1

Atuuffissaa aamma nassuiaassutit

Atuuffissai

§ 1. Nalunaarut aatsitassanik Kalaallit Nunaanni katersorneqarsimasunik imaluunniit piiarneqarsimasunik tunisinermut aamma avammut annissinermut atuuppoq, taamaattoq takuuk imm. 2.

Imm. 2. Nalunaarut atuutingilaq:

- 1) pisinnaatitsissummik pigisaqartunut aatsitassanut ikummatissanullu inatsimmi § 15 malillugu misissueqqaarnissamut akuersissummik peqartunut,
- 2) pisinnaatitsissummik pigisaqartunut aatsitassanut ikummatissanullu inatsimmi § 16 malillugu aatsitassarsiorluni misissuinissamut imaluunniit piiaanissamut akuersissummik peqartunut,
- 3) pisinnaatitsissummik pigisaqartunut aatsitassanut ikummatissanullu inatsimmi § 49 malillugu ilisimatusarluni misissuinissamut akuersissummik peqartunut, aamma
- 4) pisinnaatitsissummik pigisaqartunut aatsitassanut ikummatissanullu inatsimmi § 33 malillugu aatsitassarsiorluni misissuinissaq piiaanissarlu ataatsimoortillugit imaluunniit immikkoortillugit aatsitassarsiorluni misissuinissamut imaluunniit piiaanissamut annikitsumik aatsitassarsiornissamut akuersissummik peqartunut.

Nassuiaatit

§ 2. "Niuerutigineri" nalunaarummi matumani paasineqassaaq tassaasoq aatsitassanik siullermeertumik tunisisoqarnera.

Imm. 2. "Aatsitassat" nalunaarummi matumani paasineqassaaq tassaasoq aatsitassat tamarmik, aatsitassat qinngornernik ulorianartunik akullit ilaanatik.

Imm. 3. "Tunisineq" nalunaarummi matumani paasineqassaaq tassaasoq aatsitassanik Kalaallit Nunaanniittunik tunisineq aamma ingerlateqqillugit tunisineq sunaluunniit, ilagalugu Kalaallit Nunaannit annissinissaq siunertaralugu.

Imm. 4. "Aatsitassat immikkut ittut" nalunaarummi matumani paasineqassaaq tassaasoq aatsitassat, nalunaarummut ilanngussaq 1-imi allassimasut.

Imm. 5. "Annissuineq" nalunaarummi matumani paasineqassaaq tassaasoq Kalaallit Nunaannit annissineq sunaluunniit.

Kapitali 2

Aalajangersakkat nalinginnaasut

Pisinermut uppersaasat pillugu piumasaqaat

§ 3. Aatsitassanik tunisinermi suniluunniit pisinermut uppersaasammik tunniussisoqassaaq.

Imm. 2. Aatsitassanik tunisisup imm. 1 malillugu pisinermut uppersaasatit ingerlaannartumik normulersussavai, pisinermullu uppersaasat minnerpaamik paasissutissanik makkuninnga imaqaassaaq:

1) Aatsitassanut nassuiaat naatsoq, ajornanngippallu aatsitassap imaluunniit ujaqqap suussusaa oqimaassusaalu allassimassallutik.

2) Tunisinermi akigititaq.

3) Tunisinerup inaarnerata ullua.

4) Tunisisup aqqa najugaalu, CVR-normua imaluunniit tunisisoq CVR-normoqanngippat CPR-nr.

5) Tunisisumut attaveqarfissanut paasissutissat, ilagalugit oqarasuaatip normua immaqalu e-mailia.

Imm. 3. Aatsitassanik tunisisup pisisumut pisinermut uppersaasatit assinga ataaseq tunniutissavaa pisinermullu uppersaasat, ukiup tunisiffiusup naanerani sivikinnerpaamik ukiuni tallimani isumannaatsumik nammineq toqqortarissallugu. Pisinermut uppersaasat elektroniskinngorlugu imaluunniit pappialami uppersaasatit toqqortarineqarsinnaavoq.

Imm. 4. Aatsitassanut oqartussaarfik tamatuminnga piumasaqarpat, aatsitassanik tunisisup pisinermut uppersaasat aatsitassanut oqartussaarfimmut takutissavaa.

Imm. 5. Aatsitassanut oqartussaarfip pisinermut allagartaq assigiissaagaq aatsitassanik tunisinermi atorineqarsinnaasoq, tamanut saqqummiussinnaavaa.

Imm. 6. Pisinermut uppersaasat paasissutissanik imm. 2-imi taaneqartunik imaqartoq, aatsitassanut ikummatissanullu inatsimmi § 45 e, imm. 3 malillugu uppersaasatit naammattutut isigineqarpoq.

Aatsitassat immikkut ittut nalingisa aalajangersarneqartarnerat

§ 4. Aatsitassat immikkut ittut niuerutigineqarnissaat sioqqullugu, aatsitassanik tunisiniartup taakkua nalinginut aalajangersaaneq aatsitassanut oqartussaarfimmit piniassavaa.

Imm. 2. Aatsitassat immikkut ittut nalingat, aatsitassanut oqartussaarfip naliliinera malillugu niuerfimmi akigititanut aammalu niuerfimmi atugassarititaasut tunngavigalugit tunisinermi akigititanut naapertuuttumik aningaasartalerlugit aalajangersarneqassapput.

Imm. 3. Aatsitassanik immikkut ittunik niuerutigineqalersup, aatsitassanut oqartussap tamanna piumasarippagu, nalinganik aalajangersaaneq uppersarsassavaa.

Avammut nioqquteqarnissamut akuersissut

§ 5. Aatsitassanik annissinerni sunilluunniit avammut nioqquteqarnissamut akuersissummik peqarnissaq pisariaqarpoq, aatsitassanut ikummatissanullu inatsimmi § 45, imm. 3 aamma 45 e, imm. 3 malillugit aatsitassanik annissineq ilaanani.

Imm. 2. Avammut nioqquteqarnissamut akuersissut aatsitassanut oqartussaqaarfimmit tunniunneqartarpoq.

Imm. 3. Avammut nioqquteqarnissamut akuersissummik qinnuteqaat aatsitassanut oqartussaqaarfimmut tunniunneqassaaq aammalu paasissutissanik makkuninnga imaqaassalluni:

- 1) Aatsitassanut nassuiaat, ilanngullugu ajornanngippat aatsitassap imaluunniit ujaqqap suussusaa oqimaassusaalu allassimassallutik.*
 - 2) Annissinermi siunertaasoq.*
 - 3) Qinnuteqartup aqqa najugaalu.*
 - 4) Qinnuteqartup CVR-nr. imaluunniit CPR-nr. imaluunniit inuk CPR-normoqanngippat pas-ip assilinera.*
 - 5) Tunisiumut attaveqarfissanut paasissutissat, ilanngullugit oqarasuaatip normua immaqalu e-mailia.*
- Aatsitassanut oqartussaqaarfik paasissutissanik ilassutaasunik aammalu aatsitassat qinnuteqarnermi pineqartut takutinneqarnissaannik, qinnuteqaatip naliliiffiginissaanut tunngasunik piumasaqarsinnaavoq.*

Imm. 4. Aatsitassanut oqartussaqaarfik, aatsitassanik ataasiaannarluni annissinissamut, aatsitassanik arlaleriarluni annissinissamut imaluunniit aatsitassanik annissinissanut tamaginnut imaluunniit piffissamut erseqqinnerusumik taaneqartumut aatsitassanik aalajangersimasumik suussuseqartunnik avammut nioqquteqarnissamut akuersissummik tunniussisinnaavoq.

Imm. 5. Aatsitassanut oqartussaqaarfik, annissinerup siunertaa eqqarsaatigalugu, avammut nioqquteqarnissamut akuersissummik tunniussinissamut atugassarititaasunik immikkut ittunik, piumasaqarsinnaavoq.

Imm. 6. Aatsitassanut oqartussaqaarfik, aatsitassanut ikummatissanullu inatsimmi, nalunaarummi matumani imaluunniit aalajangersakkani aatsitassanut ikummatissanullu inatsit malillugu aalajangersarneqartuni allani aalajangersakkat qinnuteqartup naammassisimanngippagit, avammut nioqquteqarnissamut akuersissummik tunniussisoqassanngitsoq aalajangiisinnaavoq.

Imm. 7. Pisut immikkut ittut naleqquttutut nalilerneqarpata aammalu mianerisassanut aalajangersakkanut pineqartunut tunngaviusunut naapertuullutik, aatsitassanut oqartussaqaarfik imm. 6-imi maleruagassat saneqqunneqarnissaannut immikkut akuersisinnaavoq avammullu nioqquteqarnissamut akuersissummik tunniussisinnaalluni.

Imm. 8. Aatsitassanut oqartussaqaarfup uppersarsaatit assigiissaakkat avammut nioqquteqarnissamut akuersissummik qinnuteqarnermi atorneqarsinnaasut pappialanngorlugit imaluunniit elektroniskinngorlugit tamanut saqqummiussinnaavai.

Kapitali 3

Pineqaatissiissutit

§ 6. Nalunaarummi matumani § 5, imm. 1-ip unioqqutinneqarnera Kalaallit Nunaannut pinerluttulerinermut inatsimmi maleruagassat malillugit akiliisitsinikkut pineqaatissiinermik malitseqarsinnaavoq.

Imm. 2. Unioqqutitsineq imm. 1 naapertorlugu akiliisitsinermik malitseqarsinnaappat, Kalaallit Nunaannut pinerluttulerinermut inatsimmi maleruagassat malillugit pisinnaatitaasunut pisussaatitaasunullu akiliisitsisoqarsinnaavoq.

Imm. 3. Akiligassiinerit, imm. 1-2 malillugit aalajangersarneqartut, Nunatta Karsianut nakkassapput.

§ 7. Aatsitassat nalunaarummi matumani aalajangersakkanut unioqqutitsisumik Kalaallit Nunaannit tunineqartut imaluunniit anninneqartut, aatsitassanut ikummatissanullu inatsimmi § 97 naapertorlugu arsaarinnissutigineqarsinnaapput.

Kapitali 4

Atuutilernera

§ 8. Nalunaarut ulloq 1. juli 2019 atuutileroq.

Namminersorlutik Oqartussat, ulloq 26. juni 2019

Erik Jensen

/

Jørgen T. Hammeken-Holm

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

